



**Nunat Aqqinik Aalajangiisartut  
marlunngorneq novembarip 20-anni 2018-imi  
Ilimmarfimmi ataatsimiinnerannit  
imaqarniliaq**

**Peqataasut:** Aviâja Rosing Jakobsen, Ono Fleischer. Oqarasuaatikkut peqataasut: Johannes Rosing (Uju) aamma Niels Lorentzen.

**Peqataanngitsoq:** Eva Mätzler (angalalluni attaviluttumiinni pissutisagulu peqataanngilaq).  
Allatsi: Arnaq B. Johansen – NAA-nut allattaasimasoq Lisathe Møller aamma peqataavoq.

Oqaluuserisassat makkuussapput:

1. Tikilluaqqusineq
2. Oqaluuserisassat akuerineqarneri
3. Kingullermik ataatsimiinnermit imaqarniliap akuerineqarnera
  1. Imaqarniliap akuerisassanngorlugu saqqummiunneqarnera (*oktoberip 5-ani 2018-imi ataatsimiinnermit imaqarniliaq*)
4. Siulittaasumit allattoqarfimmillu ilisimatitsissutit
  1. NAA nutaamik allatsitaarnerat pillugu paasissutissiineq
5. Ilaasortat siunnersuutaasa suliarineqarnerat
  1. Kingullermik ataatsimiinnermit aaqqiissutissatut siunnersuutip eqqartorneqarnera:  
**Kangersertuaq Gletsjer**
6. Suliat aalajangiiffissat suliarineqarnerat
  1. **Narsarmijit** pillugu toqqammavilersuutissanik eqqartuineq (*takuuk ilanngussa*  
*”Oqaasiliortut Narsarmijit pillugit NAA-mut allakkiaat”*)
7. Eqqaasassat allat



## 1. Tikilluaqqusineq pillugu

Nunat Aqqinik Aalajangiisartut siulittaasuat Aviâja Rosing Jakobsen tikilluaqqusivoq. Tikilluaqqusereermat Nunat Aqqinik Aalajangiisartuni ilaasortanngortoq Ono Fleischer allatsilu nutaajummata ilisaritinnerit ingerlanneqarput.

## 2. Oqaluuserisassat akuerineqarneri pillugit

Oqaluuserisassat akuerineqarput.

## 3. Kingullermik ataatsimiinnermit imaqarniliap akuerineqarnera pillugu

### 1. Imaqarniliap akuerisassanngorlugu saqqummiunneqarnera (*oktoberip 5-ani 2018-imi ataatsimiinnermit imaqarniliaq*)

Kingullermik ataatsimiinnermit imaqarniliaq akuerineqarpoq.

## 4. Siulittaasumit allattoqarfimmillu ilisimatitsissutit pillugit

### 1. NAA nutaamik allatsitaarnerat pillugu paasissutissiineq

Allatsinngortoq imminut ilisaritippoq. Taassuma kingorna allattaasimasoq Lisathe Møller Oqaasiliortunut allatsinngornini taaguusersuuserinermullu ilisimasaqarnini tunngavigalugu Oqaasiliortunut allattaalernini nassuiaatigivai, eqqaallugulu nunat aqqinik suliaqalernermini ukiuni isikkanilinni nunat aqqi 26.000-niit 33.000-nut amerleriarsimasut. Tamanna tunngavigalugu nunat aqqi 7.000-it tammatsaaliorneqarsimaneri NAA-nut ilisimatitsissutigai.

## 5. Ilaasortat siunnersuutaasa suliarineqarnerat pillugit

### 1. Kingullermik ataatsimiinnermit aaqiissutissatut siunnersuutip

#### **eqqartorneqarnera: Kangersertuaq Gletsjer**

Kingullermik ataatsimiinnermi eqqartorneqartoq akuerineqartorlu **Kangersertuaq**

**Gletsjer** (oqaluuserisani 5.f) pillugu Eva siunnersuivoq tamanna iigartartoq kalaallisut ima ateqalissasoq: **Kangersertuaq Sermia**.

Evap siunnersuutimini tunngavilersuutigaa Tasiilami piniartut Kangersertuaq angallavigisaraat qilalugarniarfigisarlugu, kiisalu nunanit assigiinngitsunit



misissuiartorlutik angalasunit tikinneqartarnera pillugu tulluarsorivaa Kangersertuup (**Kangersertuaq**) sermitaa aamma kalaallisut ateqartinneqassasoq.

Nunat Aqqinik Aalajangiisartut aalajangiinnginnerminni Tunumi najugallit taagueraaasaat malinneqassasoq eqqartorpaat. Aalajangiinnginnerminni allattoqarfimmit misissoqqissaarneqassasoq kissaatigaat, taamaaliornermikkut assigiinngitsunik tunngavilersuusiortut ukuusunik:

- Tasiilamit Ittoqqortoormiiniillu **Kangersertuaq** piniariarfingineqartarpoq, taamaammat illoqarfinni pineqartuni iigartartup nalaa qanoq taaguuteqartinneqarnerisooq allattoqarfimmut misissugassaangortippaat. Tassunga tunngatillugu eqqaavaattaaq tunumiusut sermersuaq apusiimik imaluunniit apusineq-mik taaneqartarpoq.

- Tasiilap kujataatungaaniittoq Sermilik aamma assersuutigineqarpoq eqqaaneqarluni iigartartut qanoq tunumiunit taaguuteqartinneqarnerisut allattoqarfimmit paasiniagassangortinneqarlutik. Tassunga tunngatillugu oqaatsit 'apusineq' aamma 'sermitarsuaq' taaneqarput.

- Kangersertuaq Sermia tulluarsarlugu oqaatsip siulliup allamooruserneqartarnera aamma tunumiunit qanoq taaneqartarnerisooq allattoqarfimmit suliarisassangorlugu ingerlateqqinneqarpoq. Assersuutitut **Kangersertuup Sermia** atorineqarpoq.

- Ittoqqortoormiormiut oqaasii eqqarsaatigalugit kitaamiunit sunnerneqarsimanerunerat maluginiagassatut eqqaaneqarpoq, taamaammat aamma illoqarfinni pineqartumi najugallit imaassinnaavoq allatorluinnaq **Kangersertuaq Gletsjer** taasaraat. Tamanna tunngavigalugu imaassinnaammat Ittoqqortoormiormiut Tasiilarmiullu immikkut taaguuteqartitsisut. Tamanna misissugassangorlugu aamma ingerlateqqippaat.

## 6. Suliat aalajangiiffissat suliarineqarnerat

1. Narsarmijit pillugu toqqammavilersuutissanik eqqartuineq (*takuuk ilanngussaq "Oqaasiliortut Narsarmijit pillugit NAA-mut allakkiaat"*)



**Narsarmijit** pillugu toqqammavilersuutissanik eqqartuineranni Nunat Aqqinik Aalajangiisartut allatsigisimasaat nassuiaateqarpoq nunat aqqinik nalunaarsuineq 2007 aallarnerfigalugu sulinerup ingerlariaasaanik. Tassa nunat aqqinik nalunaarsuillutik angalasut illoqarfiit nunaqarfiillu tikitamik inuisa nunat aqqinik taagueraasaat malillugu nalunaarsuineq ingerlasimasoq. Tamanna takussutissaavoq siornatigut Tiniteqilaaq-mik taaneqartarsimasup Tiilerilaar-mik pisortatigoortumik ateqartinneqalernikuuneranik. Aamma assersuutitut ilaavoq siornatigut Illoqqortoormiut-nik taaneqartarsimasup Ittoqqortoormiit-nik pisortatigoortumik ateqalersinneqarnikuunera. Taama suleriuseqarneq siornatigut Nunat Aqqinik Aalajangiisartut akuersissutiginnikuuaat.

**Narsarmijit** pillugu pissutsit eqqaaneqartut aamma atuupput. Uanili **Narsarmijit** naqinnermik j-taqarnera pillugu Nunat Aqqinik Aalajangiisartut inatsisaat § 3, imm.2 malillugu *Nunat Aqqinik Aalajangiisartut isumaqarunik nunap aqqa allattaatsimut sukkulluunniit atuuttumut uniuuttoq, pissutsit immikkut ittut tunngavigalugit atorussanngortinneqartariaqartoq, taava Nunat Aqqinik Aalajangiisartut tamanna Oqaasiliortunut akuerisassanngorlugu saqqummiutissavaat.* Inatsik tamanna malillugu Nunat Aqqinik Aalajangiisartut **Narsarmijit** allanneqartarnera pisortatigoortumik taama allassimasussatut Oqaasiliortunut akuerisassanngorlugu ingerlateqqinnikuuaat.

Oqaasiliortut aamma Nunat Aqqinik Aalajangiisartut pisussaaffigivaat pissutsit immikkut ittut tunngavigalugit akuersisinnaatitaallutik naak allattaatsimut sukkulluunniit atorineqartumut pineqartut uniuukkalarpata. Nunaqarfik uani pineqartoq taama inissisimavoq. Sumiorpaluutaatulli allanneqartarnissaanut suliat tunngasut siulliit 1993-mi anngunneqarsimavoq, taamanili suliaq kinguneqartinneqarsimanngilaq. 1993-mili nunaqarfiup pineqartup inuisa sumiorpaluutertik atorlugu nunaqarfisik taasarusullugu kissaatigisimagaat malunnarpoq.

Ullumikkut allattaaseq eqqarsaatigalugu ilumoortortaqarsinnaavoq sumiorpaluutit atorlugit atersuinissaq aarlerinarsinnaasoq. Taamaakkaluortoq sumiorpaluutit aamma atorsinnaasariaqarput. Assersuutitut taaneqarpoq nunatsinni kangerluppasusut, taamaattumik sumiorpaluutit aamma atorsinnaasariaqarnerat periarfissaavoq



sumiissusersiornissaq eqqarsaatigalugu. Sumiorpaluutit atorlugit kangerluppasuit qulaani assersuutit taaneqartut taagorneqaleraluarpata kitaata qeqqani oqaatsit atuuttut standardsprogitut taasakkagut eqqarsaatigalugit aarlerinartorsiortitsilernissaq ilimanaateqanngitsoq eqqaaneqarpoq.

## 7. Eqqaasassat allat

Inatsisit suleriesissallu suunersut apersuutigineqarput. Allattaasimasooq nassuiaateqarpoq inatsisit malillugit suliaqarneq ingerlasartoq aammalu Nunat Aqqinik Aalajangiisartut suliaasaqarfiisa ilagigaat nunat aqqinik suliaqarneq, nalunaarsuineq, siunnersuineq saqqummiussinerillu. Suliassaqarfiit akisussaaffeqarfiit tassaapput nunat aqqi illoqarfiit avataaniittut kiisali illoqarfiup iluani nunat aqqi. Illoqarfinni aqquserngit aqqi, nunap immikkoortui sisamat tassaasut Avannersuaq, Kitaa, Kujataa kiisalu Tunu, kiisalu nunatta aqqa Kalaallit Nunaat Nunat Aqqinik Aalajangiisartut oqartussaaffiginngikkaat ilisimatitsissutigineqarpoq. Allatsip inatsisit suleriesissatullu toqqammavik apeqquteqartumut e-mailerutigai. Allattoqarfimmiit inunnit kiisalu pisortanit saaaffiginissutit isumagineqartarput, ukuli naliliiffigisassat Nunat Aqqinik Aalajangiisartunut ingerlateqqinneqartarnerat ilisimatitsissutigineqarpoq.

Nunat aqqinik ilisimasalik Angutinnguaq Olsen qujaffigineqarnerasooq apersuutigineqarpoq. Allattaasimasup qujassuteqarfiginnikuunini ilisimatitsissutigivaa.

Qanoq akulikitsigisumik ataatsimiinnerit ingerlasarnerasut apeqqutigineqarmat allattaasimasup nassuiaatigaa ukiumut arfinillit aqqanillillu akornanni ataatsimiinnerit amerlassuseqartarput.

Nunat aqqinik nalunaarsuilluni angalasoqaqqissanersooq apersuutigineqarpoq. Aningaasanik sinneqartuulaarneq allattaasimasup eqqaavaa, tamannalu aallaavigalugu Kangaamiuni nunat aqqinik nalunaarsuinissaq aasaq 2018 pisussaasimagaluartoq pissuteqavissumik pinngittoorsimasooq nassuiaatigineqarpoq.



Sumiiffinnik ateqartinneqanngitsunik atsiisinnaaneq apeqqutigineqarpoq. Allattaasimasup akivaa Nunat Aqqinik Aajalangiisartut siunnersuuteqarsinnaasut misissorneqareerneratalu kingorna naliliisoqartartoq nassuiaateqarfigivaa.

Kiinarsilluni ataatsimiissinnaaneq kissaatigineqartoq allattaasimasup ilisimatitsissutigivaa Oqaasileriffiup ningiuanut anngunikuullugu mannaluk tikillugu sulik qisuariarfigineqanngitsoq. Aningaasassaqaqtinnissaa Oqaasileriffimmit Naalackersuisoqarfimmiilluunniit pisinnaanissaa allattaasimasup siunnersuutigaa.

---

Aviâja Rosing Jacobsen

Nunat Aqqinik Aalajangiisartut siulittaasuat

Niels Lorentzen

Nunat Aqqinik Aalajangiisartuni siulittaasup tullia

Johannes Rosing

Nunat Aqqinik Aalajangiisartuni ilaasortaq

Eva Mätzler

Nunat Aqqinik Aalajangiisartuni ilaasortaq

Ono Fleischer

Nunat Aqqinik Aalajangiisartuni ilaasortaq